

Tarnimikkut nappaatilinnut immikkoortortaqarfimmi nammineersinnaajunnaarsitsinermi allaanerusumik pinngitsaaliisummik iliuuseqarneq pillugu Namminersorlutik Oqartussat nalunaarutaat

Tarnimikkut nappaatilinnik sullissinermi nammineersinnaajunnaarsitsineq, allatigullu pinngitsaaliineq pillugit Inatsisartut Inatsisaanni nr. 24-mi, 3. december 2012-imeersumi § 12, imm. 7, § 13, imm. 3, § 18, § 28-lu naapertorlugit aalajangersarneqarput:

Kapitali 1

Pinngitsaaliisummik katsorsaaneq

Piumasaqaatit nalinginnaasut

§ 1. Tarnimikkut nappaatilinnik nammineersinnaajunnaarsitsineq allatigullu pinngitsaaliineq pillugit Inatsisartut Inatsisaanni § 9 malillugu taamaallaat inuit Dronning Ingridip Napparsimmavissuani uninngasut pinngitsaaliisummillu nammineersinnaajunnaarsinneqartut pinngitsaaliisummik uninngatinneqarnissamut piumasaqaatit tunngavigalugit pinngitsaaliisummik katsorsarneqarsinnaapput.
Imm. 2. Pinngitsaaliisummik katsorsaanissaq Dronning Ingridip Napparsimmavissuani tarnimikkut nappaatilinnut immikkoortortaqarfimmi nakorsaanermi aalajangiivigineqassaaq.
Imm. 3. Katsorsaariaasissaq imarisaalu, Inatsisartut Inatsisaanni § 4-mi aalajangersagaq naapertorlugu annikinnerpaamik iliuuseqartoqarsinnaanerup sallinneqarnissaanik tunngaveqarluni aalajangiivigineqassapput.

Pinngitsaaliisummik nakorsaatitortitsineq taamaaqataalu.

§ 2. Katsorsaariaatsit allat atorsinnaangitsutut nalilerneqarpata aatsaat pinngitsaaliisummik nakorsaatitortitsisoqarsinnaavoq.

§ 3. Nakorsaatitunnginnerup kingunerisaanik napparsimasup inuunerata peqqissusaataluunniit navianartorsiortinneqarnerat eqqaassanngikkaanni, nakorsaatitornissap pisariaqassusaanik napparsimasup nassuiaattuaraluarnera sunniuteqanngippat, pinngitsaaliisummik nakorsaatitortitsisoqarsinnaavoq.

Imm. 2. § 1, imm. 2, naapertorlugu nakorsaanerup aalajangiinissaa sioqqullugu, napparsimasoq

naammaginnartumik piffissalerlugu nakorsaatitortinneqarnissamut akuersisinnaanissamut eqqarsarfissinneqassaaq. Sivilunerpaamilli ullut pingasut napparsimasooq eqqarsarfissinneqassaaq. *Imm. 3.* Nakorsaanerup eqqarsarfissinneqarnerup sivilussusissaanik naliliinnermini, imm. 2 naapertorlugu ilaatigut nappaatip navianaateqarnera sivilussusaalu, napparsimasup nakorsaatitortitaanissamut imminnut assortuuttunik isumaqarnera, nakorsaatitunnginnerullu allatigut pinngitsaaliinikkut iliuuseqartoqartariaqalerneranik kinguneqarsinnaanera napparsimasullu qanoq naalliuuteqartiginera il.il. pingaartissavai.

Imm. 4. Nakorsaanerup pinngitsaaliisummik nakorsaatitortitaanissaaq pillugu aalajangiinnginnerani, napparsimasooq apeqqut taanna pillugu siunnersortiminik oqaloqateqarnissamut periarfissinneqarsimassaaq.

Imm. 5. Eqqarsarfissinneqarnermi napparsimasooq ullut tamakkiallugit nammineq piumassutsi naapertorlugu nakorsaatitornissaanik neqeroorfigineqassaaq, kajumissaariniarnerlu allattugaatinut nalunaarneqassalluni.

Imm. 6. Navianaatillit imm. 1-imi taaneqartut eqqaassanngikkaanni, pinngitsaaliisummik nakorsaatitortitsinermi napparsimasup siunnersortaatalu nakorsaatitortitsinerup siunertaanik, sunniutaanik kingunerluutigisinnaasaanillu tamakkiisumik paasitinneqarsimanissaat piumasaqaataavoq.

§ 4. Pinngitsaaliisummik nakorsaatitortitsinermi nakorsaatit misilerarneqareersut nalinginnaasumik annertussusilikkat kingunerluutikinnerpaallu atorineqassapput.

Imm. 2. Kingunerluutaasinnaasut nakkutigeqqissaarneqassapput paasineqarniariarpatalu sapinngisamik ajunginnerpaaq anguniarlugu akiorniarneqassallutik. Tamatumunnga atatillugu pinngitsaaliisummik nakorsaatitortitaanerup taama annertutigiinnarnissaa eqqarsaatigeqqissaartariaqarpoq.

Imm. 3. Annertuallaamik nakorsaasiisoqassanngilaq.

§ 5. Nakorsaatit siviluumik sunniusimasartut sapinngisamik atornaveersaarneqassapput , nakorsaatillu napparsimasumut qanoq sunniuteqarnerannik ilisimasaqarfunngitsuni napparsimasunik pinngitsaaliisummik nakorsaaseeqqaarnissami atorineqassanatik.

§ 6. Pinngitsaaliisummik nakorsaasiinerni tamatigut nakorsamik peqataasoqartassaaq.

§ 7. § 1, imm. 1-imi piumasaqaatit eqquutsinneqarpata, napparsimasullu inuunerata annaanneqarnissaanut taamaasiornissaaq pisariaqarpat imaluunniit taamaasiunnginneq napparsimasup inuuneranut peqqissusaanulluunniit annertuumik navianartorsiortitsissappat, aatsaat pinngitsaaliisummik nerisitsisoqarsinnaavoq.

§ 8. § 1, imm. 1-imi piumasaqaatit napparsimasumit eqquutsinneqarpata, napparsimasup inuunera navianartorsiortipat imal. navianartorsiulersinnaappat aatsaat, qupinnguallatitsinikkut pinngitsaaliisummik katsorsaasoqarsinnaavoq.

Timikkut nappaammut pinngitsaaliisummik nakorsarneqarneq

§ 9. Inatsisartut Inatsisaanni § 5 naapertorlugu nammineersinnaajunnaarsitaasinnaanermut piumasaqaatinik eqquutsitsisoq timikkullu nappaammut nakorsartinnissamut paasissutissinneqareernikkut akuersissuteqanngitsoq, nappaatip pineqartup inuunera peqqissusaaluunniit annertuumik navianartorsiortippagu pinngitsaaliisummik nakorsarneqarsinnaavoq.

Imm. 2. Napparsimasoq Dronning Ingridip Napparsimmavissuani tarnimikkut nappaatilinnut immikkoortortaqarfimmut unitsitaasimanngippat, pinngitsaaliisummik nakorsarneqarnissaq sioqqullugu pinngitsaaliisummik unitsinneqarnissamut uppersarsaasiortoqarnissaa, tarnimikkullu nappaatilinnut immikkoortortami qulaani pineqartumi nakorsaaneq pinngitsaaliisummik unitsinneqarsinnaanermut piumasaqaatit eqquutsinneqarnerisa aalajangiivigereersimanissaat piumasaqaataavortaaq.

Imm. 3. Imm. 1-imi taaneqartutut pinngitsaaliisummik timikkut nakorsartinnissamut, nakorsaaneq tarnimikkut nappaatinut immikkut ilisimasalik pineqartoq timikkullu nappaatinut immikkoortortami pineqartumi nakorsaaneq aalajangiisuussapput.

§ 10. Timikkut nappaatilinnut immikkoortortamiinnermi pinngitsaaliisummik iliuuseqartoqartariaqalerpat, nammineersinnaajunnaarsitsineq allatigullu pinngitsaaliineq pillugit Inatsisartut inatsisaat naapertorlugu, nakorsaaneq tarnimikkut nappaatinut immikkut ilisimasallip nakorsaaneq timikkut nappaatinut pineqartunut immikkoortortameersup aalajangiinerat tunngavigalugu aatsaat taama pisoqarsinaavoq.

Imm. 2. Imm. 1 naapertorlugu pinngitsaaliisummik iliuuseqarneq, tarnimikkut nappaatilinnut immikkoortortaqarfimmi peqqissaanermik suliallit timikkullu nappaatinut pineqartunut immikkoortortaqarfimmi peqqissaanermik suliallit isumagissavaat.

§ 11. Napparsimasup qanoq innera timikkullu nakorsarneqarnera apeqqutaatillugu, nakorsaaneq tarnimikkut nappaatinut immikkut ilisimasallip timikkullu nappaatinut pineqartunut immikkoortortami nakorsaaneq isumaqatigiinnerisigut, napparsimasoq tarnimikkut nappaatilinnut immikkoortortaqarfimmut nuutinneqasaaq.

Maalaaruteqarneq

§ 12. Napparsimasup inuuneranut peqqissusaanullu annertuumik navianartorsiortitsinera pissutigalugu, imaluunniit napparsimasoq allanik timikkut peqqissutsikkullu annertuumik navialisitseqqunagu ingerlaannaq iliuuseqarnissaq pisariaqanngippat, pinngitsaaliisummik iliuuseqarnissamik aalajangiineq pillugu maalaaruteqarneq kinguartitsinermik kinguneqartarpoq.

Kapitali 2

Napparsimmavimmiit angerlareermermi pinngitsaaliisummik malittarineqarneq

§ 13. Inatsisartut inatsisaanni § 17-imi piumasaqaatit eqquutsinneqarpata aatsaat napparsimmavimmiit angerlareermermi malittarinnittoqarsinnaavoq.

Imm. 2. Napparsimmavimmiit angerlareermermi pinngitsaaliisummik malittarineqarnissaq pillugu nakorsaaneq aalajangiinerani nakorsartinnissaq siunertaralugu peqqinnissaqarfimmut, tassunga ilanngullugu najukkami tarnimikkut nappaatilinnik sullissivimmut, ornigunnissamik taamaallaat

imaqassaaq.

Imm. 3. Unitsitsineq pineqartoq sioqqullugu tassungalu atatillugu napparsimasup angerlareernermini pisariaqartumik nakorsarneqarnermik taamaatitsinissaanut ilimaginninnermut pissutsit suut tungavilersuutaanersut, nakorsartinnerullu taamaatinneqarnera napparsimasup peqqissusaanut qanoq kinguneqassanersoq, napparsimasut pillugit allattugaatinut nalunaarsorneqassapput.

Imm. 4. Inatsisartut inatsisaanni § 14 imal. § 15 naapertorlugu, napparsimmavimmiit angerlartinneqarnermut atatillugu pinngitsaaliisummik malittarineqarnissami, angerlalerinnermut atatillugu isumaqatigiissusiornissaq, imaluunniit ataqatigiissaarinnermut pilersaarusiornissaq nakorsaanerup akisussaaffigai.

Imm. 5. Peqqinnissaqarfup immikkoortuisa ilaannut napparsimasoq unitsinneqarluni pinngitsaaliisummik nakorsaatitortinneqartariaqarpat, qanoq annertutigisumik pinngitsaaliinikkut nakorsaasoqarsinnaanera katsorsarneqarnissamut pilersaarummi allassimassaaq.

§ 14. Napparsimmavimmiit angerlareernermi pinngitsaaliisummik malittarineqarnermut atatillugu pinngitsaaliisummik nakorsaatitortitsineq Inatsisartut inatsisaanni § 4-mi maleruagassat naapertorlugit ingerlanneqassaaq.

Imm. 2. Nakorsaatit atorineqartut, tassunga ilanngullugit sivisuumik sunniusimasartuusinnaasut, sunniutaat ilisimaneqartumik napparsimasumut iluaqutaassapput.

Imm. 3. Napparsimmavimmiit angerlareernermi pinngitsaaliisummik malittarineqarnermi nakorsarneqarnerup, napparsimasup peqqissusaanut pitsaasumik sunniuteqarnerata annertuallaanillu kingunerluuteqannginnerata qulakkeernissaa Dronning Ingridip Napparsimmavissuani tarnimikkut nappaatilinnut immikkoortortaqarfimmi nakorsaanerup akisussaaffigaa.

§ 15. Napparsimasoq nakorsaatitornissaq siunertaralugu aggerfissatut isumaqatigiissutaasut naapertorlugit takkutinngippat, Dronning Ingridip Napparsimmavissuani tarnimikkut nappaatilinnut immikkoortortaqarfimmi nakorsaanerup politiit ikiorsiullugit napparsimasup peqqinnissaqarfup immikkoortuanut pineqartumut pinngitsaaliisummik nakorsartikkiartortinissaa aalajangiivigisinnaavaa.

Imm. 2. Politiinut attaveqartinnani napparsimasumut naammaginartumik attaveqarniartoqarsimanera qulakkeerneqassaaq.

Imm. 3. Sapinngisaq tamaat piaartumik politiit ikiorserneqarnissamik qinnuteqartoqassaaq, napparsimasorlu aaneqartussaq pillugu sukumiisunik paasissutissiisoqassalluni.

Imm. 4. Napparsimasumik aallerneq angallassinertu Inatsisartut inatsisaanni § 4, imm. 3, naapertorlugu pisariaqanngitsumik kanngutsatsitsisoqaaqqunagu ajoqutitaqaaqqunaguluunniit, sapinngisaq tamaat qajassuartumik malunnaarsaartumillu ingerlanneqassaaq. Politiit peqataasut sapinngisaq naapertorlugu inuinnartut atisaqassapput. Napparsimasoq politiit biiliinut ilaatinneqassappat sapinngisaq tamaat inuinnaat biilii suliffimmi atorineqartartut atorlugit ingerlanneqassaaq.

Imm. 5. Inatsisartut Inatsisaanni § 17, imm. 3, oqaaseqatigiit aappaat, naapertorlugu peqqinnissakkut sullissisoq politiit aallerneranni sapinngisamik peqataasussaq, ajornanngippat napparsimasumit ilisarisi mane qassaaq, napparsimasorlu nakorsartissimanera ilanngullugu, ilisimasaqarfigissallugu.

Imm. 6. Napparsimasup aaneqarnermut pinngitsaaliisummillu nakorsaatitortitaanermut akiuunnera, napparsimasup nakorsartinneranut periarfissaanullu kinguneqartinneqartariaqanngilaq, tarnikkut

nappaatilinnik sullissinnermi pinngitsaaliisummik iliuuseqarnerni allanisulli napparsimasup aaneqarnermut pinngitsaaliisummillu nakorsarneqarnermut qisuariaataanut immikkut paasinnittoqartariaqarpoq.

§ 16. Dronning Ingridip Napparsimmavissuani tarnimikkut nappaatilinnut immikkoortorta qarfimmi nakorsaanerup napparsimmavimmit angerlareernermi pinngitsaaliisummik malittarinninnerup Inatsisartut Inatsisaanni § 17, imm. 6, naapertorlugu qaammatit pingasut pallillugit sivitsornissaa aalajangiuppagu, napparsimasoq siuningaaniit kingusinnerpaamillu maannamut malittarinninnerup naammassinissaa sap. ak. ataatsimik sioqqullugu ilisimatinneqassaaq.

Imm. 2. Maannamut malittarineqarnermut atatillugu kingusinnerpaamik nakorsaatitortitaanissamut kingullermut ornigunneranut atatillugu, nakorsaanerup napparsimasoq oqaatsitigut allakkatigullu sivitsuinissaq pillugu ilisimatissavaa.

§ 17. Napparsimmavimmiit angerlareernerup kingorna pinngitsaaliisummik malittarineqarnissap maalaarutigineqarnera, aalajangiinissap tungaanut kinguartitsinermik kinguneqassaaq.

Imm. 2. Inatsimmi § 17, imm. 3, aamma imm. 6, naapertorlugit politiinit aaneqarnissap napparsimmavimmiillu angerlareernermi pinngitsaaliisummik malittarineqarnissap sivitsornissaanik nakorsaanerup aalajangiinera pillugu maalaarutit aalajangiinissap tungaanut kinguartitsinermik kinguneqarneq ajorput.

Kapitali 3

Pinngitsaaliisummik aalaakkiineq nukersorfiginninnerlu

Pinngitsaaliisummik aalaakkiineq

§ 18. Inatsisartut Inatsisaanni § 19, imm. 2, naapertorlugu pinngitsaaliisummik aalaakkiisoqarsinnaavoq.

Imm. 2. Aalaakkiinnermi taamaallaat qitequtit, paffinnut aamma/imaluunniit singernernut aalaakkiissutit aqqatillu atorineqarsinnaapput.

Imm. 3. Pinngitsaaliisummik aalaakkiinialersinnani, nakorsap napparsimasumik misissuereernerani tamatumunga inassuteqaataa pissarsiarineqarsimasariaqarpoq.

Imm. 4. Nakorsap inassuteqaataanut napparsimasup massakkut qanoq innera tunngavigalugu pinngitsaaliisummik aalaakkiinissap pisariaqassusaanik nakorsap naliliinera allatullu iliuuseqarsinnaanerup, soorlu nakkutilliinerulernerup naammannginnerata imaluunniit naammassineqarsinnaannginnerata paasineqarsimanera piumasaqaataavoq.

Imm. 5. Qitequtip saniatigut paffinnut aamma/imaluunniit singernernut aalaakkiissutitik aqqatinillu atuinissaq, Dronning Ingridip Napparsimmavissuani tarnimikkut nappaatilinnut immikkoortorta qarfimmi nakorsaanermit aalajangiivigineqassaaq. Nakorsaanerup peqannginnerani nakorsaq alla aalajangiisuusinnaavoq. Taamaattoqarnerata kingorna nakorsaanerup aalajangiineq piaarnerpaamik isummerfigissavaa.

Imm. 6. Nunap immikkoortuani napparsimmavinni peqqissaavinniluunniit nal. ak. aqqaneq marluk sinnerlugit sivisussusilinnik sivisussuseqassangatitaniluunniit pinngitsaaliisummik aalaakkiinnermi aalaakkiinerup sivitsorneqarnissaa Dronning Ingridip Napparsimmavissuani tarnimikkut nappaatilinnut immikkoortorta qarfimmi nakorsaanermit aalajangiivigineqassaaq.

§ 19. Tassanngaannaq immikkorluinnaq ittumik pisoqartillugu napparsimasumut allanulluunniit isumannaallisaaneq eqqarsaatigalugu aalajangiinissap kinguartinnissaa illersorneqarsinnaanngippat, peqqissaanermi suliallit namminneq qiterusiillutik aalaakkiisinnaapput.

Imm. 2. Imm. 1 naapertorlugu iliuuseqarnissami peqqissaasoq akisussaasuusooq taassumunngaluunniit taartaasoq imaluunniit immikkut pisoqartillugu peqqissaasoq allaluunniit peqqissaaanermik suliaqartoq najuuttoq aalajangiisuussaaq.

Imm. 3. Qiterusiilluni aalaakkiinerup kingorna ingerlaannaq nakorsaq akisussaasuusooq aggersarneqassaaq, taassumalu pinngitsaaliissutip attatiinnartariaqarsinnaanera isummerfigissavaa.

§ 20. Napparsimasooq qiteruserlugu aalaakkigaq nakkutilliisoqassaaq.

Imm. 2. Peqqissaasoq, peqqissaanermik sulialik imaluunniit allamik naapertuuttumik ilinniagalik qiteruserlugillu aalaakkikkani taamaallaat suliakkerneqartoq aalajangersimasumik nakkutilliisuutitaasinnaavoq.

Imm. 3. Napparsimasup kissaataa, ataqqinassusaa, imminullu naleqartinnera ataqqillugit nakkutilliisoqassaaq.

Imm. 4. Napparsimasumut tunngatillugu isumannaallisaanermut ajoqutaanngippat, nammineq inuttut inuuneqarnissamut pisinnaatitaaffeqassaaq.

§ 21. Pinngitsaaliisummik aalaakkiineq attatiinnarneqarpat, aalaakkiinissamik aalajangiinermiit pinngitsaaliisummik qiterusiinikkut aalaakkiinerup ingerlatiinnarneqarnissaa pillugu apeqqut, pissutsit apeqqutaatillugit akulikitsunik minnerpaamilli ullup unnuallu ingerlanerani ataasiarluni nakorsamit naliliivigineqartassaaq. Nakorsap naliliinera allattugaatinut ilanngunneqassaaq.

Imm. 2. Peqqissaanermik suliallit pinngitsaaliisummik aalaakkiineq pisariaaruppat sukkulluunniit taamaatissinnaavaat.

§ 22. Napparsimasut namminneq toqqissisimanissartik siunertaralugu aalaakkerneqarnissamik kissaateqarnerat tunngavigalugu aalaakkiineq nakorsamit akuerineqarnikkut aatsaat pisinnaavoq.

Imm. 2. Napparsimasut imm. 1 naapertorlugu aalaakkikkat immikkut nakkutilliisoqarnissamik neqeroorfigineqassapput.

Imm. 3. Qinnuteqaat aalaakkiisimanerlu Inatsisartut inatsisaanni § 30 naapertorlugu, napparsimasumut tunngatillugu allattugaatinut pinngitsaaliisummillu iliuuseqarnernut nalunaarsuivimmut nalunaarneqassapput.

Nukersorfiginnineq

§ 23. Pinngitsaaliisummik aalaakkiinissamut piumasaqaatit eqquutsinneqarpata, napparsimasooq peqqinnissaqarfiup immikkoortuisa arlaanni uninngasoq uninngatinneqarsinnaavoq, pisariaqarpallu nukersorfigalugu sumiiffimmi immikkoortumut allamut nuutinneqarsinnaalluni.

Imm. 2. Pisuni ataasiakkaani suup atorineqarnissaa, Inatsisartut inatsisaanni § 4 naapertorlugu annikinnerpaamik iliuuseqarsinnaaneq eqqarsaatigalugu aalajangiivigineqassaaq, taamatuttaaq

nukersorfiginninnissap qanoq annertutiginera apeqqutaatillugu, piumasaqaatit sukannernerulersinneqassapput.

§ 24. § 23, imm. 1, naapertorlugu nukersornissamut piumasaqaateqanngikkaluarpalluunniit, Inatsisartut inatsisaanni kapitali 3 naapertorlugu nammineersinnaajunnaarsitat immikkoortortamiiginnarnissaat qulakkeerniarlugu pisariaqarpat nukersorfigineqarsinnaapput.

§ 25. Napparsimasup nappaatini pissutigalugu eqqissiveeqisup peqqinnerulernissaanut aalajangiisuuppat, pisariaqarpat nukersornikkut iliuusitut annikinnertut eqqissisaatitortinneqarnissaa nakorsap aalajangersinnaavaa.

Imm. 2. Eqqissisaatitortitsinermi nakorsaq peqataassaaq.

Kapitali 4

Napparsimasoq illersorniarlugu aalaakkiineq

§ 26. Illersuiniarluni aalaakkiineq imatut paasineqassaaq inuk imminut piaarinani annertuumik ajoqusersinnaaneranut illersorniarlugu arlaatigut pisarialimmik iliuuseqarneq.

§ 27. Napparsimasoq illersorniarlugu aalaakkiinissaq sioqqullugu, napparsimasumik takuniaareernermi nakorsaq tamatuminnga inassuteqaqqaassaaq.

Imm. 2. Nakorsap napparsimasumik illersuiniarluni aalaakkiinissamut inassuteqaataani, napparsimasumik illersuiniarluni aalaakkiutip suup qanoq annertutigisumik qanorlu pisoqarnerani atorineqarnissaa taaneqassaaq.

Imm. 3. Napparsimasumik illersuiniarluni aalaakkiinissanik inassuteqaataasunik aqutsinerit ataasiakkaat ingerlanneqarnissaat peqqissaanermik sulialinnut isumagitinneqarsinnaavoq.

§ 28. Napparsimasoq illersorniarlugu aalaakkiisutitut ilaapput qitequtit assigisaalluunniit napparsimasup siniffimminit issiavimminilluunniit nakkarluni imaluunniit paatsiveerusimaarluni angalanermini ajoqusernissaa pinaveersaartinniarlugu qajassuartumik atorineqartartut.

Imm. 2. Illersuiniarnermi siunertamut suut tulluarnernerannik napparsimasumullu suup iluarinarnerussaneraniq naliliineq tunngavigalugu suup illersuutitut atorineqarnissaa aalajangiivigineqassaaq.

Pinngitsoorani naliliisarneq

§ 29. Napparsimasumik illersuiniarluni aalaakkiinerup ingerlatiinnarneqarsinnaanerata nakorsamit naliliivigineqartarnera, pissutsit apeqqutaatillugit akulikitsunik minnerpaamilli iliuuseqarnissamik aalajangiinerup kingorna ullut pingasut, qulit, 20-t, 30-llu qaangiunnerini tamatumalu kingorna inassuteqaatip atuutsinneqarnera tamaat minnerpaamik sap. ak. sisamat qaangiunnerini pisassaaq.

§ 30. Napparsimasumik illersuiniarluni aalaakkiinerup napparsimasumut isumannaatsuunera eqqarsaatigalugu, pisariaqartitsinermiit annertunerusumik atorineqannginnissaa inassuteqaatillu

tamatuma allanngortinneqarsinnaanerata, periarfissaqarnerit tamaasa apeqquserneqartarnissaa, nakorsat peqqissaanermillu suliallit nakkutigisassaraat.

Kapitali 5

Immikkut nakkutilliineq immikkoortamilu matunik parnaarsineq

Immikkut nakkutilliineq

§ 31. Napparsimasup imminut toqunnissaa imaluunniit arlaatigut nammineq allalluunniit peqqissusaannik annertuumik ajoqusiinnaanera imaluunniit napparsimasup uninngaqtiminik allanilluunniit malersuinissaa annertuumilluunniit ajoqusiinissaa pinaveersaartinniarlugit napparsimasup nammineq akuersissutigisimanngisaanik aatsaat immikkut nakkutilliisoqarsinnaavoq.

Imm. 2. Immikkut nakkutilliineq imatut paasineqassaaq sulisup ataatsip arlallilluunniit napparsimasumit nigoratik nakkutilliisinneqarnerat. Nigutsaaliorneq imatut paasineqassaaq napparsimasup uffarneq perusuersarnerlu ilanngullugit nakkutigineqartuarnerani sulisut pinasuartumik iliuuseqarsinnaanerat.

Imm. 3. Napparsimasumik immikkut nakkutilliinissaa nakorsap misissuereernermini aalajangiivigissavaa. Aalajangiineq allattugaatinut nalunaarneqassaaq.

Imm. 4. Immikkut nakkutilliineq ataannartumik nal. ak. 24-t sinnerlugit sivilissuseqarpat, immikkut nakkutilliinissamik aalajangiineq Inatsisartut inatsisaanni § 42 naapertorlugu Tarnimikkut Nappaatillit Maalaarutaannik Aalajangiisartunut maalaarutigineqarsinnaavoq.

Immikkoortortami matunik parnaarsineq

§ 32. Immikkoortortami napparsimasut init uninngavii, napparsimasut kapitali 3 naapertorlugu nammineersinnaajunnaarsitat, napparsimasut Inatsisartut inatsisaanni § 23 naapertorlugu piaarinatik imminnut annertuumik ajoqusersinnaasut ilanngunnagit, matunik parnaarsisoqarsinnaavoq.

Imm. 2. Napparsimasup nammineq kissaatigippagu matunik parnaarsinissamik aamma aalajangiisoqarsinnaavoq, napparsimasulli imm. 1-imi aalajangersakkamut attuumassuteqanngitsut inaannut matut parnaarneqassanngillat. Napparsimasup piumasarippagu matu ingerlaannaq parnaarusarneqassaaq.

Imm. 3. Immikkoortortami matunik parnaarsinissaa nakorsamit aalajangiivigineqassaaq.

Imm. 4. Napparsimasut imm. 1-imi aalajangersagaq naapertorlugu immikkoortortami matunik parnaarsinissamik aalajangiinermut attuumassuteqanngitsut, immikkoortortami sulisunut saaffinninnikkut sapinngisaaq tamaat kissaataappallu immikkoortortamit anisinnaanermik ingerlaannaq neqeroorfigineqassapput.

Imm. 5. Matunik parnaarsinissaa aalajangiunneqariarpat imm. 4-mi aalajangersagaq naapertorlugu immikkoortortamit aninissamut periarfissaaq ilanngullugu, immikkoortortami napparsimasut tamarmik kalerrinneqassapput.

Imm. 6. Immikkoortortamut unitsitaanermut atatillugu immikkoortortap aaqqissorneqarnera immikkoortortamilu minnerusunik immikkoortorta qarpat taakku matuisa parnaarneqarsinnaanerat ilanngullugu, napparsimasooq ilisimatinneqassaaq.

Kapitali 6

Pinngitsaaliisummik timikkut eqqiluisaartitsineq

§ 33. Tarnimigut nappaatilik nappaanni pissutigalugu timikkut eqqiluisaarnissaminik isumaginnissinnaanngitsoq, napparsimasoq nammineq, uninngaataasut sulisulluunniit eqqarsaatigalugit pisariaqarpat, pinngitsaaliisummik eqqiluisaartinneqarsinnaavoq.

Imm. 2. Napparsimasup pinngitsaaliisummik timimigut eqqiluisaartinneqarnissaa Dronning Ingridip Napparsimmavissuani tarnimikkut nappaatilinnut immikkoortortaqaqfimmi nakorsaanermit, napparsimasup massakkorpiaq eqqiluisaarnikkut qanoq inneranik misissuineq naliliinerlu tunngavigalugit, aalajangiivigineqassaaq. Nakorsaanerup aalajangiinera tamatumunngalu tunngavilersuutaa napparsimasoq pillugu allattugaatinut nalunaarneqassapput.

Imm. 3. Pinngitsaaliisummik eqqiluisaartitsineq assersuutigalugu tassaasinnaavoq uffarneq, qulinneq, kigutigissarneq, assersuutigalugu puiguttortuni nangernik nalequttanillu taarsiineq il.il.

Imm. 4. Pinngitsaaliisummik eqqiluisaartitsineq, inatsimmi § 4-mi annikinnerpaaffimmiititsinissamik tunngaveqarnissamut aalajangersagaq naapertorlugu, sapinngisaq tamaat napparsimasumut pisariaqanngitsumik kanngutsatsitsinngitsumik ajoqusiinngitsumillu qajassuartumik isumagineqassaaq.

Imm. 5. Pinngitsaaliisummik eqqiluisaartitsinerit pillugit maalaarutit napparsimmavimmi oqartussanut saaffginnissutaassapput.

Kapitali 7

Atuutilersitsineq

§ 34. Nalunaarut atuutilersinneqarpoq 16. december 2013.

Namminersorlutik Oqartussat, ulloq 2. december 2013

Steen Lyngé

/

Ann Birkekær Kjeldsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut